

Desmantelacion di Partido RAIZ a continua e siman aki

DEN menos di 6 luna di tempo, partido RAIZ cu na 2021 a converti su mes den un organisacion politico prometedora despues di e proceso electoral, a conoce un periodo di decadencia formal cual a culmina e siman aki, cu retiro di dos figura prominente di e partido.

Raymicheline Raymond hunto cu Carlos Guiamo a anuncia nan distanciamiento for di e partido di Ursell Arends pero sin cu nan a duna informacion riba nan futuro como politico activo por lo pronto. Esaki ta nifica cu den un periodo di cinco luna, e plataforma politico aki a perde tres di su miembronan prominente y tin indicacion cu lo no dura mucho cu ex Presidente di Parlamento, Raymond Kamperveen, tambe lo anuncia su retiro for di RAIZ y tambe for di arena politico.

Den e proceso electoral di 2021, RAIZ a bira un di e sorpresanan grandi di esaki caminda e partido bou di guia di Ursell Arends, a logra di ricibi un total di 5481 voto loke a resulta bon pa un asiento mas, un asina yama “restzetel.” Mesora cu resultado di eleccion a bira conoci ya caba a anticipa cu partido MEP cu a saca un total di 9 asiento den e eleccion ey, lo a yega na un acuerdo di cooperacion, loke hopi experto ta kere cu esaki a ser palabra for di prome cu eleccion a tuma luga.

MEP y RAIZ a logra forma un mayoria minimo pa goberna e pais pero a confronta cantidad di crisis interno caminda vision y principio di e dos organisacionnan aki, tabata liña recta contra otro, sigur pa loke ta un contracto cu gobierno a firma cu e compania di Eagle LNG sin cu gobernantenan of parlamentarionan a ser permiti pa mira contenido di

e documento aki. Sinembargo tanto fraccion di RAIZ forma pa Raymicheline Raymond y Raymond Kamperveen nunca a para firme y asina Gabinete Wever Croes II a sigui na bida, pasando den momentonan sumamente dificil.

Aki tin cu señala cu no ta solamente partido RAIZ mester a guli su principio politico manda abou pa mantene e coalicion na poder ya cu na 2023, Minister Ursell Arends a dicidi di entrega un keho contra di Minister Presidente Evelyn Wever Croes, pa un permiso otorga na inversionistanan di e hotel Embassy Suites, pa construccion di un pida beach net dilanti di e hotel, otro banda di caminda.

Nunca antes por a mira un mandatario anula y elimina un keho asina entrega na Ministerio Publico pero e crisis aki tampoco a logra di tumba e gobierno aki sino ta te na 2024 ora cu durante di ceremonia na luna di September pa habrimento di un aña parlamentario nobo, a surgi e momento fatal.

Contrario na palabracionnan di tres aña caba, fraccion di RAIZ a dicidi di pone Raymond Kamperveen como candidato p’e puesto di Presidente di Parlamento y hunto cu 10 miembro di oposicion, a logra di baha e Presidente di e ultimo tres añanan, esta Edgard Vrolijk loke a conduci cu MEP a dicidi di kibra tur confiansa y a manda Parlamento cas. Fuera di retironan oficial di e dos candidatonan di RAIZ e siman aki, ya caba tin otro politiconan cu oficialmente a anuncia nan retiro for di politica, entre otro Ricardo Croes lider di RED y Armando Lampe, kendenan a sufri nan di dos derota fulminante den un proceso electoral.

E lider di CURPA, Eddy Ras tambe a anuncia su retiro for di politica ora cu otro intento pa gana confiansa di pueblo votado, a termina den otro desilusion y aki tin cu menciona cu tin rumornan insistente di retiro di algun otro politico pero ainda nan no a haci esaki oficialmente. Ursell Arends lider di RAIZ ainda no a bin dilanti y atende cu retiro di su coleganan Misha Raymond y Carlos Guiamo y duna informacion riba plannan pa futuro di e plataforma politico cu el a logra di funda.

relax, unwind, rejuvenate

eforea™
SPA
Hilton Aruba

Book your journey now

Open Daily 9 AM – 6 PM | +297 526 6052 | auahh_eforea_aruba@hilton.com
J.E. Irausquin Blvd. 81, Palm Beach | hiltonaruba.com | @hiltonaruba